

Toleransia Intolerabel

Sin duda un palabra importante i apresiá awendia na diferente parti di mundu ta e palabra “toleransia”. E palabra ta tan apresiá ku nan asta ta selebrá *Dia Internashonal di Toleransia*.

Kiko ta “toleransia”? Talbes un bon definishon por ta pa respetá i soportá punto di bista, kreensianan, práktikanan di otronan sin ku bo nesesariamente ta di akuerdo.

Klaramente Palabra di Dios ta enkuashá siertu toleransia. Dios ta instruí nos pa “*soportá otro i pordoná otro, si un di boso tin un keho kontra un otro*” (Kolosensenan 3:13). “*Nos ku ta fuerte mester soportá e debilidatnan di esnan ku ta sin forsa, i no djis agradá nos mes*” (Romanonan 15:1). Di amor bèrdadero, Skritura ta bisa “*tur kos e ta soportá*” (1 Korintionan 13:7). Tin ora nos tin ku soportá kos di hende ku nos ta haña desagradabel.

Ma mi tin problema serio ku e mentalidat ku ta promové toleransia.

1. **E promoshon di toleransia ta un manera pa deshás di tur norma.** Algun hende ke deshás di e reglanan ku nos Kreador a preskribí pa nos por funshoná optimal i pone nan mes reglanan. Pa hopi di nan, toleransia ta bira nan úniko regla.

Ma para ketu i pensa un ratu. Si ami tin ku tolerá tur bo palabranan, akshonnan, kreensianan, èts., i abo tin ku tolerá tur kos di mi, anto no tin regla mas. E ora ei, nada ta bon i nada ta malu, i tur kos por!

2. **Ta impusibel pa biba den un komunidad unda toleransia ta manda.** Unda toleransia ta manda, ladron por hòrta trankil i polis no por arest’é pasobra mester tolerá komportashon di otro! Unda toleransia ta manda, por kore outo bou influensia di alkohòl, i nos mester tolerá e shafür su sistema di bida! Asta si e ke manehá su outo na banda robes di kaminda, nos tin ku tolerá su sistema creativo di stür!

Klaramente ta impusibel pa nos biba asina! Ningun pais por sobrevivá sin leinan. **Mester tin kos ku ta bon i kos ku ta malu!** Ta impusibel pa hasi toleransia nos étika.

Bo ta malamente kiboká si bo ta kere ku Dios ta tolerá tur kos! Dios a duna hende Su mandamentunan den Skritura santu pasobra E ta stima nos i ke nos bon. Hende ta liber pa ignorá Su leinan, ma hende lo no ta liber di e konsekuensianan penoso di ignorá Su leinan. Kòrdando esaki, **ta un akto di amor—no intoleransia—pa avisá hende ku nan ta bai den un kaminda kontrario di leinan...** sea ta leinan di Dios òf di nos pais!

3. Beibel ta mustra bon kla ku piká no ta kos pa tolerá. Papiando di “*obranan infruktifero di skuridat*” Skritura ta bisa ku nos tin ku “*eksponé nan; pasobra ta bèrguensa asta pa papia di e kosnan ku nan ta hasi na sekreto*” (Efesionan 5:11-12). Hopi biaha hende ke pa nos tolerá nan kosnan ku di bèrdat ta un bèrguensa asta pa papia.

4. **Hopi biaha, toleransia ta un wega di un direkshon so.** Lògikamente, si ami mester tolerá abo, abo mester tolerá ami. Ma echu ta ku hopi di esnan ku ta promové toleransia ke pa ami tolerá nan, ma nan no ta despuesto pa tolerá ami. **Nan por ta hende sumamente intolerante ora bo perspektiva no ta harmonisá ku esun di nan.**

Por ehèmpel, toleransia ta promové komo un argumento pa aseptá homoseksualidat komo un sistema di bida normal. Ma si bo ta tribi ekspresá bo preokupashon pa ku e enfermedatnan i trastorno ku homoseksualidat lo okashoná den nos komunidad, mes ora nan ke snur bo boka, denunsiando bo komo “intolerante”. **Ken anto di bèrdat ta intolerante?**

Frankamente bisá, **awendia toleransia ta un arma popular—i efektivu—ku hopi hende ta usa pa haña nan gana.** Pa mi, tal toleransia ta intolerabel.